

Inzko uputio čestitku Antóniju Guterresu povodom imenovanja za novog generalnog sekretara UN-a



Visoki predstavnik Valentin Inzko uputio je čestitku Antóniju Guterresu povodom odluke Generalne skupštine Ujedinjenih naroda da ga imenuje na funkciju devetog generalnog sekretara UN-a. „Imenovanjem g. Guterresa ukazana je čast njemu lično, kao i njegovoj zemlji, Portugalu. U nemirnom svijetu u kome danas živimo, uloga Ujedinjenih naroda je važnija nego ikada prije. Imenovanjem g. Guterresa, Ujedinjeni narodi će dobiti iskusnog lidera koji će biti na visini ovog ogromnog zadatka.“

Visoki predstavnik, koji se susreo sa g. Guterresom 2009. godine prilikom njegove posjete Bosni i Hercegovini u svojstvu visokog povjerenika UN-a za izbjeglice, naglasio je da će ogromno iskustvo koje je g. Guterres stekao kao visoki povjerenik UN-a, te kao premijer Portugala i predsjednik Socijalističke internacionale, svakako doprinijeti uspjehu na funkciji generalnog sekretara.

„Želim g. Guterresu uspjeh u ostvarenju vizije Ujedinjenih naroda, iznesene u njegovom izlaganju. On je, između ostalog, rekao da se UN mora pobrinuti da se svako, kada vidi plavu zastavu, osjeća zaštićenim. Ujedinjeni narodi i sve agencije UN-a su po završetku rata pružile veliku podršku u procesu implementacije mira u Bosni i Hercegovini. Radujem se našoj

budućoj suradnji, te kontinuiranoj podršci miru, stabilnosti i prosperitetu u Bosni i Hercegovini“, zaključio je visoki predstavnik.